

按

粵

疏

稿





勘敘征黎功次疏

奏爲仰仗

天威官兵奮勇力戰攻破二崗險巢陣獲首功恭  
報捷音以紓

聖懷事萬曆四十二年九月十八日奉都察院勘劄

在兵部咨該總督兩廣軍務兵部右侍郎陞南

京刑部尚書張

題前事又該本官題爲遵

旨討平黎寇功收一鼓勦撫兩全敘錄文武官員以

昭激勸以勵人心事俱奉

聖旨兵部知道欽此欽遵又該兵科叅看得斯役也  
動兩省之甲兵傾積歲之財賦以從事于蠢爾  
之小夷前事之失計甚矣今藉手告成于以補  
過則可乃鋪張太侈旣及于守土之文吏又及  
于西粵之守臣敘之者固爲有詞當之者未免  
無色揆之舊章不亦過乎然夷性愚悍犷戾師  
至則逃師歸則叛善後之策不可不深長思耳  
抄出酌之通抄到部看得前項夷情功次相應  
照例查勘庶便議敘咨院轉行廣東巡按御史



備查該鎮擒斬夷級是否真正見獲夷賊作何  
究擬有功員役作何敘議傷亡人役作何優恤  
前此戴罪人員功過應否相準至于善後之策  
其征進地土田產應否建縣鎮壓并議募兵屯  
種尤須加意圖維以保久安長治逐一嚴勘的  
實徑自具奏以憑覆

請等因移咨劄行到臣案查接管卷內先奉勘劄爲  
周黎殺傷官兵查叅前後故違節制僨事官員  
以嚴紀律併酌議相機撫勦便宜以靖反側以

奠海邦事准兵部咨該總督兩廣兵部侍郎張

題叅崖州知州林應材等失事緣由奉

聖旨該部知道欽此又該前按臣周

題爲黎岐

互相攻殺官弁違議貪功兩損官兵貽害地方

查叅失事官員事奉

聖旨兵部知道欽此欽遵該本部覆議合候

命下將林應材曾國棟曾忠趙孟麟陳廷策孟延慶

行督按衙門提問具

奏張守貴等各戴罪通候事完分別議處姚履素



蔣光彥俱各策勵以圖後效一切機宜悉聽督  
臣便宜行事不爲中制等因具題奉

聖旨是欽此欽遵移咨劄行前來依行按察司將曾

國棟等提問張守貴等戴罪策勵其黎岐該督

臣張

調發官兵行委廣州海防副總兵張

萬紀雷廉副總兵楊應春瓊崖參將張守貴統

兵進剿去後續據監軍副使姚履素報稱賊黨

聯合衝突張萬紀部兵陣亡督令副千戶蘇之

俊殺死把總哨兵二百餘名張萬紀抑鬱而殞

又該前按臣周

會同督撫張

具疏查

叅失事官員張守貴楊應春革去冠帶充爲事  
官姚履素等戴罪自效并議增兵勦撫該兵部  
覆議題奉

聖旨是黎夷猖獗著督撫官便宜調度相機進剿毋  
致滋蔓其失事楊應春等俱依擬行王鳴鶴身爲  
大將著奮力收功不得怠玩欽此咨行督撫張

通行欽遵調集土漢官兵剿撫事完將擒斬  
功次招撫過殘黎功罪官員分別敘報外隨蒙



前因除鵬勦陵水縣廖二崗功次原該督撫張

另疏題

報免敘今應免覈外該臣案行廣東按察司將所報  
擒斬崖黎功級嚴加覈實及查勘各員役功罪  
并撫處善後事宜議報又該臣入境時查得官  
兵敗北之後叛黎復出劫掠鄉村燒營戮兵隨  
牌行司查自四十二年十一月起至四十二年  
十月止道府州縣將領所報叛黎突出某州縣  
地方剽劫鄉村殺戮百姓抄掠財畜焚燬房舍

逼城燒營殺兵奪糧各若干鄉民逃徙若干卽  
今有無復業狼兵所過雷廉瓊三府地方強掠  
士民財物若干強捉婦女姦淫若干毀壞房屋  
什物若干逐一備查數目係何文武官員信地  
失事通行查勘的實要見某官有罪無功某官  
有功無罪某官過不掩功某官功不救過某官  
功過相當議處明白併入勘功疏內以憑敘議

回

奏去後續據按察司提得曾國棟曾忠林應材葛



經等究罪明白回

奏劄行遵照外又據分巡海南道詳解生擒黎賊  
那保等赴臣鞫審當批面視諸賊中有十餘齡  
者大抵摻山所得應否駢戮抑可斟酌重輕待  
以不死按察司審報隨據該司會同布都二司  
審過那保等招解前來該臣審批各賊逐一面  
審有獲于生岐者有獲于熟黎者有摻于山上  
村邊者皆非當陣拏獲招中于諸將敘功之下  
有馘斬而無生擒固已了然矣除那保有名賊

首法在不赦外如那聞等止是抱由之黎獲則  
取之其平日之順逆固不得而知也各賊口多  
不服就中尚可分別議擬求生于死否多命所  
關不厭詳慎該司再一細鞫確招詳奪其在崖  
州監犯那不那業等與鄉勇生擒之賊仍行紀  
功官速審確併報又據該司呈詳行准海南兵  
巡道行據瓊州府會同紀功推官傅作霖覆覈  
過八路官兵擒斬功級撫過殘黎等項冊報到  
臣該臣覆覈又據據勘擒斬功級所稱大小賊

首憑何考據須得確實乃可定賞斬級覆覈似  
真而生擒者除監故外見存那保等仍照本院  
面審批詳會同布都二司再加鞫確分別議擬  
妥當與在崖州監犯各罪名俱應敘入庶可結  
局其狼兵所過騷擾止報瓊屬尚雷州徐遂等  
縣未報仍宜併查至於曾國棟僨事繫獄在先  
叛黎復出焚劫高村等處在後亦皆誘之國棟  
恐無以服其心也兩廣功次原有題

在賞格今據開開員役內有一人而獲功一名類或



二三人共獲二三名類且多係零星摻捕皆開  
願陞與例未合土官頭目原無陞例不宜混開  
千總何敢當巡檢謀國相等生擒賊從十一名  
何無名姓是否真實卽應削除仍查邦政條例  
定議陞賞庶無冒濫陣亡被傷官兵須明註已  
未給恤于冊通再覈實酌議妥詳去後又蒙本  
院批據徐聞縣申報狼兵經過雷廉有龍英州  
兵到縣被頭目岑球等侵匿所折行糧竊賞致  
各兵四出抄掠殺傷驛夫淫污婦女折毀房屋

又路擒一人細縛送縣擁眾嚇銀遍批執照等  
緣由蒙批狼兵之害至此海北何辜而遭此荼  
毒該縣懲前慮後欲飾將來蓋亦無可奈何矣  
按察司議報詳內情節應采入勘疏內方爲實  
錄并查之依行分巡海南道回稱查得狼兵經  
過廉雷騷擾彼時瓊民近途次者風聞俱已搬  
移逃避且頭目岑球先蒙軍門牌行前道會同  
總兵官押赴

令旗牌前處斬傳首梟示次頭目馮先等分別細

打諸軍肅然又准分巡海北道關據欽州靈山  
縣各報狼兵竝無強掠姦污惟合浦縣開報龍  
英州土兵搶掠鄉村財物等情該本司看得崖  
黎之役遠徵狼兵謂其足以殄黎靖我疆場已  
耳豈其所過騷擾鄉民除議允以後凡有再調  
狼兵事宜移行海北海南守巡各道遵照者為  
定例遵行外又該本司行廣州府理刑官將那  
保等研審明實具招前來覆審無異議將那側  
等發海北充兵詳蒙本院批那保等既覆審明



確那保那賢等八名皆賊中渠魁法宜懸首俱  
依擬監候奏

請處決那側等十二名與逃民李宵月屋從謙二名  
准發充兵但海北去海南密邇恐其潛歸發羅  
定各營爲便那流年稚與幼小那不等共六名  
准發賣以存不殺之仁俱候

題允明文至日行其解文無名字者削除那沍等  
急催紀功傳推官作速審勘確報謀國相零星  
獲賊似不必入勘疏之內果真酌議另賞可耳

餘照行繳依蒙遵照外隨行往海南道關據瓊  
州府會同推官傅作霖再將各路官兵擒斬功  
級細加覆覈明實及查賊首逃民姓名俱係未  
征之先已經前道訪查的確開報前軍門發單  
與將官知照生擒賊首據其自供姓名住址查  
對與原名村坊相符斬獲賊首有嚮導人等結  
認照原開等第報爲賊首其餘無名者俱爲賊  
從呈解道鎮及紀功官審驗無異分別大小賊  
首俱有訪單案卷可據等因冊報到道該本道

副使戴燁覆看得有罪不懲則啓釁喪師者輒以敵爲戲而以事爲嘗有功不敘則運籌執銳者將難服其心而責其後職自渡海以來詢之文武事外之人叅之道路輿人之口據之該府及刑廳之勘報請陳其槩而及其詳蓋黎岐之爲患也實在腹心自昔難制弘治嘉隆與萬曆年間節次征勦邇來生齒日繁布滿山谷加以亡命勾引大肆跳梁虔劉我人畜荼毒我商旅此亦易之所謂田有禽也者乃此一役也初之



發難其罪固自難掩終之奏捷其功亦自匪細  
茲據府廳覈實功次委與原

題報數相同卽不敢謂隻輪不返黎氛盡熄而京  
觀已築故土已安民人復業商旅周行且饑糧  
鎧仗一領於數年額餉之節縮贖銀之贏餘上  
不敢請於

朝廷下不增派於民間此之爲功亦胡可少也其效  
勞大小文武各官委應分別敘議陣亡被傷官  
兵除經前道給恤外其餘亦應併恤但各兵多

係遠方遊食獨夫無親屬認領難以議給又查  
曾國棟債事在四十一年而叛黎復出高村新  
地等村燒毀茅房一百三十五間虜去牛馬二  
百三十餘隻殺死男婦二十九命射傷男婦二  
十名口又劫橋頭營房一處保平港一處逃竄  
一十六戶係在四十二年七月以後係哨官吳  
業立營構禍時國棟已繫獄中非其手事但由  
啓豐所致國棟已罹重辟吳業事敗卽時潛逃  
難以追論死傷他僑人戶已陸續招回復業各

恤其家善後之策已詳議于抱由舊巢建立磚  
堡一座內設守備衙宇一所工已告竣亦已銓  
有職官前來矣羅由等峒田產經委員役逐坵  
履丈僅苗田一百一十九頃二十七畝零獨班  
師初行文報約計田地四千六百四十頃恐委  
官乘見崗寨遼闊不分荒埔儘其地土槩行文  
報不無過多况羅活各村昔年曾經勦定其田  
皆報有黎糧今諸黎招降甚衆間有原業尚戀  
耕種非如羅旁之田向無輸糧削平盡沒入官



者比茲本道會同何叅將已將諸田分給各黎  
及藥弩手三百名領耕餘者無幾又樂平樂安  
樂定三處之兵各有百名徐世瓊屯兵有二百  
唐雄等亦及百家計已及千似可抵

題議屯田之數又查兩年征黎軍門用過司餉等

銀一萬二千四百五十四兩六錢一分四釐一

毫米五萬三千四百二十石三十四升四合七

勺五抄鹹魚三十四萬四千零二十八斤一十

五兩鹽一十萬八千零八斤七兩已經查核並

無虛冒等因連功次冊報到司該本司覆覈得  
自萬曆四十二年十一月十八日誓師起至班  
師止八路官兵共擒斬功級五百五十一名顆  
又本年七八九月大兵未臨之先黎賊突出官  
兵擒斬四十八名顆又四十一年內生擒大賊  
首一名逃民一名前後通共擒斬六百零一名  
顆內除督令官朱禮斬級一顆因解賊騷擾奉  
軍門削除又審驗年幼那流那不那立那隙那  
烈那眇六名姑隹發賣又撥山續獲那側那顯

那溜那悶那屈那元那乜晚低相相那邦那命  
那尾與逃民李肖月屋從謙共一十四名審屬  
矜疑姑發營伍充兵以示不殺之仁又海南道  
解賊文內無名日隆那抹那爛那勒那凱那計  
謝海那枕那坎那使十名千總何敢當擒獲二  
名巡檢諶國相擒獲二名鄉勇徐世瓊擒獲四  
名又審結良釋放陳玉洲一名通共四十名類  
削除不錄外實錄東一路雷廉副總兵革去冠  
帶戴罪立功楊應春部下生擒首從賊三十四



名斬級一百零四顆俘獲賊屬五十七名口奪  
回被擄一十四名口招撫殘黎逃民共一萬三  
千九百五十八名口西一路惠潮副總兵今陞  
廣西總兵黃越部下生擒首從賊五名斬級七  
十四顆俘獲賊屬三十三名口賊首妻一口西  
三路原任陽電叅將今故葉應春部下生擒首  
從賊二十六名斬級二十四顆俘獲賊屬二十  
名口奪回被擄一口收降招撫殘黎一百七十  
一名口東二路廣西柳慶叅將熊大經部下生

擒從賊五名斬級五十一顆俘獲賊屬四十七  
名口收降殘黎六十四名口西二路廣東都司  
僉書今陞肇慶練兵遊擊王選部下生擒首從  
賊二十名斬級四十五顆俘獲賊屬一十九名  
口收降殘黎六百六十五名口東三路原任坐  
營今故葉思義部下生擒首從賊五名斬級二  
十七顆俘獲賊屬十名口收降殘黎九十八名  
口北路白沙寨把總今陞濶洲遊擊王熙部下  
生擒首從賊二十三名斬級一十七顆俘獲賊

屬二十三名口收降招撫殘黎四百零三名口  
總鎮中軍營納授指揮今故王中燿部下生擒  
首從賊一十五名斬級四十八顆俘獲賊屬一  
十三名口又千戶龍光熙百戶何其鳴等共生  
擒首從賊一十一名斬級二十五顆俘獲賊屬  
二口又指揮趙孟麟等生擒賊首首惡逃民共  
二名通共擒斬功級五百六十一名顆計生擒  
一百四十六名內有名大賊首那保那臭二名  
賊首那矮等四十二名次賊首那國等三名賊



從那律等八十八名主謀首惡逃民劉一信白  
允策二名通黎逃民唐那蘊等九名斬獲賊級  
四百一十五顆內賊首首級三十四顆次賊首  
首級一顆賊從首級三百七十八顆通黎逃民  
首級二顆內首從賊犯那聞那矮那國那律劉  
一信唐那蘊等一百三十八名陸續監故照例  
斬級數驗明白并逃民賊首劉一信妻陳氏一  
口監故外尚存大賊首那保一名賊首那本那  
尾那長那蓋那郎那賢六名賊從那捧一名俱

審確無枉監候題奉

明旨允日聽軍門遵照原題

在嚴法令以靖地方事例處決各獲功員役俱明註  
在冊查與原題

報數相同陣亡官兵一十八名被傷官兵七十五員  
名俘獲賊屬男婦大小共二百二十四名口奪  
回被擄男婦共一十五名口奪獲沙水牛一百  
二十八隻馬三匹賊仗一千一百八十五件賊  
物耳塞一雙布被六番收降招撫殘黎男婦共

一萬五千三百五十九名口收穫禾稻一百一十七倉以上被擄審明給親林亞肖等領回賊屬除病故外餘與贓物變價湊支建築城堡牛馬給屯守兵民領耕及給主與犒賞官兵賊仗改充兵器首飾貯庫禾稻除分賑各黎及征兵行糧又借給屯耕兵民種子收降黎岐并招撫殘黎安插官坊鏡底等村崗居住又查監犯那洹那不等俱在崖州監故又四十一年指揮趙孟麟等誘獲黎賊那臭係有名首惡逃民白允



策係構黎作孽幸就生擒相應敘錄土官頭目  
與名色員役原開願陞於例有碍俱改應賞至  
有二三三人共獲一功亦止以一功論賞陣亡家  
丁狼兵十八名內十二名已經給恤尚六名未  
給被傷官兵七十五員名已給恤二十八名尚  
未給四十七名亦宜恤賞但各兵多係遠方遊  
食無親屬認領難以議給查得邦政條例內開  
兩廣不時用兵今後一人自擒斬三名顆四名  
顆五名顆俱實授一級不賞六名顆以上亦止

陞一級餘功扣筭加賞不及前數者不陞又一  
款征山斬從賊首一顆賞銀一兩生擒者賞銀  
二兩不願賞者每三功當一級斬獲有名小賊  
首一顆賞銀十兩生擒者賞銀十五兩不願賞  
者每二功當一級至斬獲奏內有名大賊首者  
賞銀二十兩生擒者賞銀三十兩不願賞者陞  
實授一級又一款旗舍餘丁民兵人等為事間  
擬充軍立功徒罪不拘已未發遣奉文立功贖  
罪者如永遠充軍新自擒斬二名顆終身軍二

名顯立功徒罪一名顯俱准贖開伍餘照例加  
陞若舉監生員吏典有犯充軍立功徒罪照依  
前擬止准贖罪開伍功多照例扣賞永不許復  
役今冊內官員或係二三人而共擒一功斬一  
級其零星捕獲者又似撥山之功遽議陞授似  
與條例未合應遵改賞外又查得舍人楊于京  
功次冊開俱共擒斬議陞與例不符周舉龔達  
原告贖罪查周舉原征交夷退縮擬辟龔達原  
爲誑騙問擬函口所軍各功俱係首從共擒於



例未合俱應改賞原任虎頭門寨把總劉葵先  
犯徒罪查其擒斬共四功與例相符與隊長陳  
明功罪已經查明各應准贖陳廷策孟延慶原  
為曾國棟從問徒題奉

欽依追納贖銀其獲功次應改給賞其曾國棟弟男  
曾國禎等俱生員報効共擒斬六名顆匪贖國  
棟之罪查例難贖應議列賞林應材馳撫多叛  
葛經招徠遺黎應否贖罪請自上裁又查副千  
戶蘇之俊原報係被箭傷拏去在彼身故今道

開列同副總兵張萬紀參將張守貴俱係死事  
武職相應一體恤錄其後以紆忠冤者也該本  
司覆看得五指諸山峰巒層疊皆峻嶺斷壑幽  
菁鳥道卽九盤七折不啻過之又有毒霧毒蟲  
藥泉藥箭皆足傷人是又武溪之多毒淫也諸  
黎蟠據于中負固跳梁蓋自嘉隆以至于今旋  
叛旋勦非一日矣邇來抱由羅活二崗恃種類  
之日繁棄亡命之勾引復爾嘯聚流劫荼毒鄉  
村甚至戕戮官兵焚燬營壘且敢逼近州城意

在不軌是誠罪大惡極而不可解宜來

天討之加矣茲仰仗兩臺九伐之威丈人之吉及各  
文武竭盡心力共佐下風以致渠惡就俘殘黨  
掃滅剗兩崗之遺孽雪一方之冤憤至今窠穴  
變爲坦途菁叢開作阡陌而衣糧兵仗惟取諸  
額餉贖銀之贏餘而自足較諸興師十萬糜費  
不貲僅了一局者其功似不少也所有受事各  
大小文武除經兵科叅駁外其餘應聽分別敘  
議以示勸懲以責其後者也其一切善後事宜



與安插民黎用過糧餉各款俱經該道就近查核妥確議報已悉毋容再贅等因連造繳覈過功次冊到臣該臣查覈相同看得黎岐盤據瓊南所恃者高山峻嶺深林密菁之險而四面皆我州邑其形勢如在釜中原不能爲有無也第非我族類其心必異往往乘間跳梁劫奪行李剽掠鄉村以爲我編氓之患故自瓊視黎則又如腹心之有宿疾時作時止急則治之緩則舍焉何來制馭之法如斯而已所可恨者內地奸

民勾引生事既已導黎而入而海外奸弁踴躍  
用兵又以戡黎爲功瓊之未免苦黎與我之不  
能無事于黎有由然者先是四十一年羅抱之  
役起于百戶曾國棟知州林應材故違院道之  
明文輕決進勦之左計其初敗于官坊村也國  
棟尸之其再敗於多澗村也曾忠尸之此皆死  
不償責者未幾而有三路進攻之役統以副將  
張萬紀翼以楊應春張守貴宜可以得志于黎  
而萬紀兵律不嚴條分條合一面遣撫一面移

營其下多不用命輕率而進以致兩路遇伏多  
命遭殘陣亡千戶一把總四哨官九督陣官三  
與陣亡兵共二百七十八員名可不謂大劔哉  
夫以黎之得志如彼我之屢挫如此天道無不  
還之理人心有必報之仇而况蠢爾之夷乘勝  
猖獗焚燒營壘流劫居民一年之間爲禍最烈  
安得不大創之則夫是役也奉

天討以興師遣大將以渡海犁其巢穴繫其老幼收  
其儲積并其土田其逆我顏行者委肝腦于鋒



鎬之間其願就招徠者雜耒耜于編戶之內從來負固之地遂爲阡陌之場而衣糧兵仗之資取諸額餉贖緩之積閭閻不擾金錢無糜其功自有不可泯者故以始事言之則無端構禍者於法在所必誅而以終事言之則戮力戎行者於功在所必賞以事內各官言之則前雖有罪後竟有功賞罰不可不權而以事外各官言之則有功在後無罪在前持論不可不恕臣請一數焉以文職論海南道臣姚履素誤信以黎

攻黎之言致啓姦弁喪師之禍提封千里責有  
專司雖欲卸罪不可得者第其原詳督臣竝無  
議勦之文乃奉行着之過而後此不避瘴癘勞  
瘁千端以收效于桑榆此自功過當相準者守  
北道臣蔣光彥雖帶海南之衝然大海爲隔彼  
中事體原不與聞卽曾國棟等始創此議未以  
一字呈該道也彼旣不尸其謀安得代任其罪  
至于後此督餉極爲勤勞此自有功無過者以  
武職論游擊袁應兆奉委督兵輕率趨進及三

路奔北鼠竄而歸至今談張萬紀等之敗於本  
官有餘恨焉此自去官不盡其辜者誠爲有過  
無功矣副總兵楊應春身當一路敗難辭咎第  
當其屯兵多澗也張萬紀身爲主將始命其督  
東路而又召之隨中路及應春奔馳于道而吳  
伯朋輕進敗矣是其敗也應春猶有可原厥後  
萬紀殞命應春代攝治兵甚整士馬歡騰而大  
征之日首當賊鋒爲諸路倡所擒斬招撫居最  
過豈足以掩功哉總兵王鳴鶴名雖大將然通



省兵事自有文吏主持何能越俎而代也聞黎  
事再敗之日鳴鶴請行督臣張鳴岡以小醜無  
須大帥遂止之其究也能殲彼匪茹以發舒華  
夏之氣其功偉矣若夫督臣張身駐端州

距瓊崖二千餘里方該道之以黎事請也曰把  
守峒口耳曰勒獻首惡耳曾國棟曾忠之敗實  
小人釁勇速禍卽該道見在瓊崖尚不知其進  
也而督臣安能止之雖張萬紀之敗將非其人  
督臣無所辭過然其兢兢籌畫備極苦心不肯

輕費一錢不肯輕勞一民猶諭諸將以剽爲撫  
毋殺降爲功此其一念惻怛所全活甚多有如  
督臣貴在首功勢必玉石俱焚雖數千級可獲  
也臣于此段心竊重之况其代弁輩受過而又  
不敢以弁輩卸肩竟以抱憤成疴鬱鬱而死死  
之日猶念黎局未竣與道臣潘潤民涕泣言之  
此亦鞠躬盡瘁之臣矣以上諸臣皆曾經指摘  
者臣受事以來詢之輿論叅以已見其功過當  
權如此且督鎮二臣已先朝露臣何私心之有

其他奉徵發以從事效犄角之成勞文職如布  
政使喬學詩等武職如副總兵黃越等自當計  
功受賞無庸贅矣夫賞

國之典也怒鼉猶式燔臺而鼓古人所以教民勇  
也况粵非無事之國使披堅執銳同心敵愾者  
不蒙敘錄之恩何以勵將士之心而作死綏之  
氣哉爲照原任鎮守廣東總兵都督同知今回  
衛病故王鳴鶴倚天長劍橫海修梁奇略深沉  
收赤蟻玄蜂于把握雄風激烈掃孤蓬輕箠於



須臾遙制固乏先圖臨戎自成偉績此一臣者  
統率三軍指揮各將膚功旣奏恬退自甘所當  
重加優恤者監軍則原任兵巡海南道今被論  
降調回籍副使姚履素慷慨談兵咄嗟辦賊雖  
始謀未慎致煩問罪之師而逆黨成擒可雪覆  
車之耻品是狐裘羔袖功爲爛額焦頭督餉則  
原任分守海北兼海南道今大計聽調回籍右  
叅議蔣光彥勇能分過誼切同心糧糗先庚水  
舟航而陸車輓羽書旁午士宿飽而馬騰驤才

裕經營功收底定以上二臣在姚履素以擅自  
離任經臣論劾議降二級今當念其前勞稍爲  
劑量或從輕降調或厚加賞賚蔣光彥原係波  
及口無怨言其雅量有足多焉所當從優敘錄  
仍行賞賚者統兵進勦則管雷廉叅將事副總  
兵戴罪楊應春雄才橫槩賦詩猛氣提刀飲血  
且耕且守賊臨四面而全無退心善戰善謀義  
激三軍而克收後效原任惠潮副總兵今陞廣  
西總兵黃越燕領英標龍韜偉畧撥捕欲窮鼠

穴廓清共掃蠻烟原任陽電叅將今故葉應春  
叱咤千人自廢指揮三鼓皆盈勇紀先登功收  
雙捷廣西柳慶叅將熊大經連鑣接戰冒矢爭  
雄風飛劔有精光嵐淨山餘新翠原任廣東都  
司僉書今陞肇慶練兵遊擊王選衝險一身是  
膽揮戈五指無峯力捍孤城才堪半壁原任白  
沙寨把總今陞濶洲遊擊王熙七尺雄軀一腔  
壯志堵截橫江置網招徠落羽歸巢以上六員  
在楊應春勞苦功高應復冠帶仍遇大將推用



黃越熊大經王選王熙並應優賚葉應春師捷  
身死殊爲可憐相應賚恤者也發餉則原任左  
布政使喬學詩原任分守嶺南道右叅議魏濟  
憂國真心救時妙手添竈能增士氣發緡不費  
軍興選委監紀則原任按察使被論降調董肇  
胤肇畫皆百勝之謀委用極一時之選慮周局  
外黎在目中發兵則驛傳嶺南兵巡道右叅政  
兼僉事黃克謙原任海北分巡道右叅政兼僉  
事今故李文奎原任糧儲道副使兼右叅議今

陞任劉毅原任分巡惠潮道副使今陞任陳一  
教原任分巡嶺西道副使今致仕回籍顧起淹  
原任羅定道副使今陞分巡嶺西道右叅政兼  
僉事王永寧原任巡視海道右叅議兼僉事今  
陞任喻安性原任分巡南部道僉事今故劉承  
諏義氣纓冠共急戎行組練成羣煙燧立消助  
勦共濟紀功則原任惠州府通判今陞任周一  
奎瓊州府推官傅作霖筆下鋪張絕少軍中情  
態難逃人服鑑衡身當勞怨辦餉則儋州知州

曾邦泰原任臨高縣知縣今陞任張弘毅原任  
會同縣知縣今丁憂鄧桂芳原任感恩縣知縣  
今陞任林士挺邑里無騷轉輸自裕星檄敬共  
夙夜雲屯喜爨樵蘇宣令則兩廣坐營都司僉  
書李可久廣海衛署指揮同知事指揮僉事陳  
照旌旆巖明壯威聲于幕府鼓旗整肅揚義槩  
于蠻方荷戈從事則韶州所都指揮僉事陳諫  
肇慶衛指揮僉事王廷鳳南山所千戶龍兆熙  
儋州所百戶何其鳴海州所百戶王錫印程鄉



所試百戶古濟鎮撫武舉王人喆名色千總把  
總易貞吉劉葵繆弘緒胡來賓鄧尚傑等員役  
及各土州官目或戮力戈矛並著俘馘之績或  
殫心招撫共收綏靖之庸其名姓俱列功冊內  
自有賞格在運餉則原任主簿韓朝臣巡檢謀  
國相涉險不辭勞瘁齎糧克副軍儲以上文武  
各員俱有撥亂之功宜膺賞賚之典者若已故  
諸臣議餉則有瓊州府知府今故謝繼科計兵  
致粟指困爲籌金鍾常有贏餘漕輓一遵次第

領兵則有原任坐營今故葉思義總鎮中軍營  
納授指揮今故王中燿借箸風雲合變揚旌壁  
壘生威白刃猶腥黃壚堪悼死事則原任廣州  
海防副總兵張萬紀原任分守瓊崖叅將張守  
貴原任肇慶衛副千戶蘇之後裒革竟酬素志  
結纓空抱雄心視不受含死當爲厲以上五員  
或憂勞命殞或臨陣身亡均當優賚內張萬紀  
師徒撓敗罪固難原而以死勤事勞亦難沒蘇  
之後身死戰陣尤與萬紀等不同仍宜查例敘

錄者也善後則海南道副使戴煝度地分田畫  
兵食相資之策宣威布德收漢夷兩賴之功瓊  
崖叅將何斌臣志逐狐貍身披荊棘築壘功成  
百雉屯兵惠饗千牛所宜竝行紀錄者也至若  
原任總督張鎮定如山洞觀若火制萬全  
於洗穴焚巢之計用衆以貞開三面于魁頭裸  
體之民止戈爲武餼糧本之節嗇嘔出心肝將  
士諭以機宜焦疲筆舌齋志不無餘恨忘身克  
底成勞所當從優敘錄恤其身後以爲勞臣之



勸者但大臣

恩典請自

上裁臣未敢定議原任按臣周

料敵狡夷褫魄

談兵宿將輸籌秉白簡以伸威三軍股慄推赤  
心而勵士兩崗塵銷精已竭於炎荒愛尚遺於  
氓庶此宜一併優賚者也見任總督兩廣右都  
御史兼兵部右侍郎今陞南京戶部尚書周

夔龍品格方虎才猷胸蟠數萬甲兵消戎心  
于帷幄計悉百年桑土定勝算于針芒當民窮

方竭之秋而首培其元氣值餉誦兵單之日而  
克振夫餘威仁恩草木皆沾事業乾坤不朽夫  
前此之殘局至後始收則後此之殊庸視前爲  
烈此應特加優敘仍行厚賚者應聽

上裁至于善後事宜則築堡分田已有成緒而戍兵  
所難惟餉督臣周 多方撙節脫巾無虞其

生擒各賊未必一一陣獲者臣反覆鞫問除陸  
續監故外尚存大賊首那保一名賊首那本等  
六名賊從那捧一名共八名已經審確無枉相

應正法合無行令督臣遵照前例押赴市曹處  
決梟示其餘摻山所得那側等與逃民李肖月  
等共十四名并年幼那流等六名待以不死用  
示好生陳玉洲一名審有結良相應超釋外鄉  
官助米助力生員報効及漢土官兵功次悉聽  
兵部覆議行總督衙門照格給賞應贖罪者准  
與贖罪應改賞者照例改賞其陣亡狼兵除已  
給恤外尚六名未給應併查恤被傷官兵未給  
恤者四十七員名旣稱班師散回已無見在似



不必行百戶曾國棟開釁喪師斬無可原旣辟  
其父姑賞其子知州林應材前之躁動可恨後  
之招撫亦多酌量功辜應聽部議指揮趙孟麟  
千戶陳廷策鎮撫孟延慶失事罪名已經叅問  
納贖其擒獲功次趙孟麟罪原止杖賞猶可叨  
陳廷策孟延慶幸免退脫之刑難邀非分之賞  
通判葛經枉法貪贓公論切齒究竟無功可錄  
別案間遣允宜判官塗必達旣已去任姑免追  
論吳伯朋係名色把總臣已經自拏問見經正

罪收降招撫殘黎一萬五千三百五十九名口  
安插居住各已樂業總聽海南道將隨時布置  
務期民夷相安可也臣又查得四十一年官兵  
敗績之後逆黎焚劫甚慘督臣張

報捷疏

內已畧言之臣今覈查入疏未敢隱漏所以明  
不欺也但構禍之吳業事發卽逃仍應嚴緝正  
罪若狼兵騷擾之害極爲可恨然首惡岑球業  
已正法似不必追求矣再照有賞有陞此自舊  
例第各官擒斬功次皆係首從共之者與陞級

之例未合故止議賞雖諸將士尚多怏怏而臣  
所執者邦政條例未敢曲徇也伏乞

勅下兵部再加查議上請

聖裁施行緣奉劄仰查覈具奏及係仰仗

天威官兵奮勇力戰攻破二崗險巢陣獲首功恭

報捷音以紓

聖懷事理未敢擅便爲此今將覈過官兵勦撫崖州

羅活抱由二崗黎賊擒斬實錄功級收降招撫

殘黎與陣亡被傷員役數目分別開坐造冊具



本專差承差魏應茂齋捧謹具奏

聞伏候

勅旨奉

聖旨兵部知道

問過把總張錡招出疏

題爲武弁違法脫軍侵屯冒糧戀印營私乞

賜提究以飭軍政事臣查得接管卷內萬曆四十二

年三月二十八日奉都察院勘劄准兵部咨該

前按臣周 題叅惠州衛指揮使陞碣石寨

把總張錡貪污不職相應提問緣由本部覆奉

聖旨是張錡著革任行巡按御史提問具奏欽此欽

遵移咨劄行前來該前按臣案行按察司將張

錡革任提問續據呈詳批回勘丈屯田未報該

臣接管催據招解到臣審得張錡包冒屯田租糧未明再三駁查清丈明白隨據該司經歷司呈奉本司帖文該本司署印右叅政兼僉事黃克謙問得一名張錡年五十三歲係惠州衛指揮狀招本衛有左右中前四所額設栢埔平湖等處二十屯共額田四百五十五頃九十六畝四分類糧一萬三千六百七十八石九斗二升屯操旗軍共四千四百八十名內屯軍二千二百餘名每名給田二十畝每軍收穀十二石先



年地方寇亂軍民逃散屯田拋荒水衝沙壓勢  
豪包占繼後蕩平田地多未開墾正統十四年  
丈量實存屯田三百八十三頃四十四畝四分  
止科額糧九千二百九十七石一斗九升至萬  
曆九年奉例清丈得屯田七百一十四頃七十  
五畝屯糧其一萬二千九百四十八石八斗四  
升萬曆十三年蒙

恩詔行查虛糧各所旗軍告蒙院道委官再三勘明  
通詳布政司嶺東道轉詳兩院批允豁去新丈

屯田二百五十頃八十九畝四分除去浮糧三千六百五十一石六斗五升仍依正統年間額糧九千二百九十七石一斗九升追徵以後沿流交接冊籍不明至萬曆二十四年內蒙委錡掌管本衛印屯奉文將各所屯田造冊會同本府清軍官派撥總小旗軍人承種辦納細糧錡見各所屯田荒熟不同科糧不一歲支屯糧不足合當申詳清查屯額補足軍食爲是錡就不合因循不理聽從軍民侵包有都樂屯萬曆九

年清丈額田地塘共三十一頃四十三畝八分五釐田側尚有堪墾荒蕪田地有在官民王仲善朱見沈彥等生員袁服周謝天德等陸續將屯內荒田占墾過八頃八十五畝四分七釐尙未發露錡又不合不行清理只將各所見存屯田論糧分派見在旗軍照管是致各軍受畝多寡不等又有各軍派承屯糧不足就將別屯田糧品搭湊補以致一軍掛名二三屯又有蠟石黃塘沙湖等屯共田一千餘畝原派不在官軍



人蔡貴伍于楚等二十三名承種因見田畝或在汙下水患或在高亢旱災荒蕪難耕各軍未肯認領比餉又不合不設法申明責領致造派田冊未填軍名轉繳清軍廳備照今已清丈前田姑責各軍開鑿辦納細糧又有本衛原額歲徵屯糧折色米三千零九十九石零六升三合三勺每石折銀三錢共該銀九百二十九兩七錢一分八釐九毫俱係本衛徵完解府收貯隨後逐月領回本衛散給各軍月糧每年徵糧照

例原無增減收銀入已又本衛四所軍伍除前  
冊爛無憑稽查自萬曆二十六年正幼旗軍七  
百七十九名以後新收開除不等至三十三年  
陸續新收實在食糧正幼旗軍八百六十名該  
衛原額本折色屯糧共九千二百九十七石一  
斗九升內本色糧米六千一百九十八石一斗  
二升六合七勺每石折銀四錢五分共銀二千  
七百八十九兩一錢五分七釐零一絲折色糧  
米三千零九十九石零六升三合三勺每石折

銀三錢共銀九百二十九兩七錢一分八釐九  
毫九絲計筭通衛正幼旗軍共支本折色米一  
萬零七石六斗五升錡先儘原額屯糧九千二  
百九十七石一斗九升支給外該年軍多糧少  
與無田各軍月糧不足支給該衛自三十三年  
方行具文照例請支民糧應請本色米六百石  
零三斗四升七合八勺每石例該銀四錢五分  
折色米三百一十石零一斗一升二合二勺每  
石該銀三錢比錡又不合不查本折糧米實數



分別請支却乃朦朧混請本色米六百七十一石五斗九升五合計多請過本色米七十一石二斗四升七合每石加折色米銀一錢五分計自三十三年起至三十七年止共冒請過銀四十五兩三錢七分八釐比錡又不合將前銀冒領入已又各屯每年屯佃承頂軍人皆有俗例每屯多寡不等歲以爲常錡接管印屯合當清革宿弊爲是又不合不行革除仍沿舊套索取常例倚在官家人張欣張望卽張金養爲漁獵

每年終差在官軍軍蘇可立趙夢起劉允沈德  
益王勝同張欣張望各亦不合承票下屯斂得  
栢埔平湖蠟石等屯軍人黎成王仲科招亞妹  
等每年共科銀七兩三錢六分十七年共計銀  
一百二十五兩一錢二分俱係趙夢起等送交  
錡又不合接受入已又有已省發軍人馮益章  
告承故軍何惟相又已省發謝勝告承故軍賴  
經各屯田一分錡又不合每人索承例銀二兩  
入已馮益章謝勝證又本衛每年額徵軍需銀

一百二十兩收貯本衛公用遞年拜進

表箋函袱水脚解司料價經歷俸薪衛所紙劄操

練火藥霜降春鞭門神解京冊盤費等項共用

銀九十二兩七錢一分尚銀二十七兩零專應

總叅過往下程之用自二十四年起至三十五

年止尚該存銀九十一兩比錡亦又不合侵匿

前銀入已至三十六年查盤查出前弊裁革各

應總叅下程銀二十七兩不徵以後三十六年

實徵銀九十二兩七錢至四十一年五月報陞



止俱已明白開銷訖。鈎前項虛索侵冒情弊一  
向未露。至四十一年六月內。蒙巡按周御史巡  
歷惠州訪知。及風聞餘款。將鈎責發分守道收  
問。隨蒙本院憲牌行道。照單研究。有無虛實。要  
見十七年來軍伍逃故若干。見在若干。餉銀扣  
除若干。曾經申明何衙門索免田常例若干。加  
派折色若干。役占軍人妻子若干。一一確審。速  
報。以憑參處。就蒙巡按周御史將鈎前項事情  
具疏參題。蒙部覆奉。

欽依將錡革任提問移咨劄行巡按衙門提問蒙行  
按察司提審招解又蒙兩廣軍門案行按察司  
遵奉

欽依將錡革任聽巡按御史提問行府遵照蒙行海  
防鮑同知丈勘蒙廳詳委經歷與史等官廖同  
泰等兼同指揮劉源達等分定各屯清丈得蔣  
田等十五屯不但足額而且踰額獨陽口大埔  
白田岡尾各屯少一二頃者又詳道改委經歷  
張國瑚等復丈隨據呈報丈完陽口等四屯俱

溢萬曆九年之數惟都樂一屯未足今新丈之  
田攤派額糧每畝不過派米一斗六七升回視  
國初之每畝三斗已輕而失額之糧盡復不但見  
在無田軍一百二十七名歲請府庫之糧可省  
卽見在本衛各官之俸糧亦取足于屯糧之本  
折而有餘矣移關到府蒙朱知府審得張錡隱  
匿軍需冒支糧銀徵糧常例與家人軍卒張欣  
等悉照前情究擬皆不爲枉問擬張錡依管軍  
官員支軍糧入已者張欣蘇可立等俱依非因



公務科斂人財饋送人者與張錡各徒三年具  
招連錡等解司詳審蒙廳將都樂屯虧額田一  
十四頃五十六畝四分催行指揮劉源達前去  
該屯丈量及將王仲善袁服周等墾占過屯田  
一併丈得二十九頃五十八畝四分六釐仍少  
一頃八十五畝三分九釐不足本屯萬曆九年  
額田三十一頃四十三畝八分五釐劉源達又  
將屯老書筭朱俊賢等俱係包占之人稟廳鎖  
押丈明除將有契冊載稅田種俱給還原主訖

查無契冊研審稱係開墾屯內荒田俱耕成熟  
各願退出取具王仲善謝天德袁服周沈彥李  
學諒張思立祝萬齡駱惟泰嚴萬生朱晃徐三  
德羅高等退狀并佃人承狀前來審李學謨等  
所告劉源達之贓私各證執稱無影劉源達之  
開占田一冊則有可據問擬李學謨依誣告人  
徒罪王仲善依侵占田律袁服周等俱依不應  
杖罪具招解蒙分守道批府覆勘袁服周等田  
仍委精明官公同劉源達覆丈另招詳奪隨蒙

按察司批府解詳前招蒙批張錡久戀印屯叢積姦弊其科索常例今僅王仲科等數名乾沒軍需今僅五十一兩縮屯田之額而增請民糧錡云仍前矣但丈田何以甚溢缺在伍之軍而侵冒月餉錡云無缺矣然派田何以懸殊若折色之有無增多王亞八等之曾否查勘招中俱未敘明款內似有遺漏事關叅

題法宜詳密仰府會同理刑官覆查確詳蒙府會同理刑官推官覆審錡隨將科索屯規侵匿軍



需實數供報將錡等照擬徒罪招解按察司覆  
審無異俱依府擬招解巡按田御史審批張錡  
誅求常例尅匿軍需坐贓徒懲似亦非縱矣第  
張錡之難解者在于包屯冒糧纔一經手卽削  
去屯田二百五十餘頃以八百餘頃之田不足  
贍九百餘軍之食仍創爲支閏之例冒支民糧  
至五千五百九十兩謂其全無染指誰則信之  
據錡口稱論糧不論畝糧不足故借補夫糧從  
畝出豈有派糧不計畝者乎查錡派田冊內有

一軍而承至一百六七十畝者率稱荒田及各  
官履畝而丈則坵坵有佃畝畝有租豈盡姦軍  
包占哉至于冊內有田千畝並無承田之軍則  
歷年收租者爲誰又有一軍而掛名四五屯者  
此又何故該司再摘提承田數多者并有田未  
開軍名者根究著落情弊自明確招解報蒙司  
行府摘提承田多者并有田未開軍名者各到  
官遵照批駁情弊再加查審明白招解比袁服  
周等隨乞免再丈各願退出前田還官錡隨將

各軍原承田數遞出蒙本府王知府審得張鈞  
原定有贓罪姑如原擬至如千畝之田而無軍  
承則原有其人祇緣畝已荒蕪難於開墾又或  
在汗下屢懼水患或田在高阜屢苦旱災未遽  
認種姑容其開鑿免其二年之糧於四十七年  
起徵其種田名數見查有書冊合附卷備照將  
鈞與王仲善袁服周等問招解詳到司有王仲  
善仍又不合具狀捏稱指揮劉源達刑逼退田  
等虛情詞赴兩廣周軍門告准批仰惠州府查



報蒙府審將王仲善依原擬侵占官屯徒罪招  
詳軍門蒙司審看得張錡屯有定額糧有實科  
昔之田需皆覈之軍今之糗糧何請之民且田  
被侵而不查糧任折而不計罪可遁乎若王仲  
善等視若贅疣耳何恠于人各百畝或數十畝  
而漫無稽着也旣經該府審擬前來合照分別  
徒杖其餘或陞科未盡及開墾數少與未到之  
羅高等悉從寬宥至于千畝原承有人第以旱  
潦相仍尚需火耕水耨應從府議免糧二年容

其開鑿成業起徵李學謨規告坐誣併徒張錡  
賊罪歷審已確似難苛求俱如原擬蒙將錡等  
具招解詳蒙巡按田御史審批張錡賊罪據招  
似晰但招稱十三年勘豁新丈田二百五十餘  
頃除去浮糧三千六百餘石鮑同知原審謂無  
文案可據而張錡又云經詳兩院允行事干回  
奏不厭詳慎該司查確連原案送驗至於都樂屯  
丈出侵占田王仲善等尚嘵嘵有詞也仍行歸  
善縣再與勘明以服其心限一月內詳報速速

蒙司行府轉行歸善縣查勘隨蒙兩廣周軍門  
批府前詳王仲善招由批仰按察司查詳蒙司  
行府查撥得原奉布政司劄付勘詳白田一屯  
嶺東道案驗勘詳上嵐等屯奉兩院批允准豁  
清丈浮糧各情由連卷呈繳到司催併歸善縣  
提得王仲善等到官蒙陳知縣查勘得王仲善  
等侵屯是真但非熟田乃荒田也開墾多年工  
費亦鉅合無止追占田不追花利具由解府蒙  
署印督捕程通判覆審無異依原擬招詳到司



蒙司查得萬曆十三年委有各軍告豁浮糧通  
詳布政司嶺東道轉詳總督吳軍門巡按汪御  
史各批准除去加丈浮糧照依正統年間額糧  
九千二百九十七石一斗九升追徵文卷解驗  
果非張錡虛挽復詳看得屯田原爲贍軍而設  
故軍民各業自有疆界豈容混侵乃王仲善李  
學謨等各乘都樂屯軍竄田蕪輒起而據有之  
歲月漸積至八百八十餘畝迨委官丈勘尚爾  
借口民業妄恣囂逞寧復知有三尺哉不知尺

籍民圖判然自別旣無冊契何所憑準今再四  
查勘卽仲善等亦俛首心服矣據其侵占念有  
餘年法應計追花利但府縣審勘原係墾荒已  
費工力姑免追用照數歸屯罪各如律張錡與  
蘇可立張欣等各照原擬招詳連送豁糧案卷  
前來覆查詳驗無異除王仲善張欣等批回該  
司照招追贖定發哨瞭發落外該臣看得張錡  
以肉食之夫叨印屯之任濫竽一十七載當局  
全無片長而一味貪婪多方漁獵承田各有常

例貧軍之剝膚堪憐徵糧大肆需求各佃之吞  
聲尤甚軍需之出入有常經也而乾沒九十餘  
兩居然假公以濟私軍糧之盈縮有定則也而  
冒支四十餘金寧非借軍以肥己其尤可恨者  
屯糧不足請支民糧而屯田實非不足也按籍  
而求則今之軍視洪武原數爲少履畝而丈則  
今之田視萬曆九年尤多而乃以正統之米爲  
不易之額致請過民糧五千五百九十有奇臣  
初讀招情大爲髮指竊怪姦弁之敢于侵匿也



乃今反覆駁查則謂由于軍民之混淆荒熟之  
錯雜而本弁未有影射然誰司屯政而敝壞至  
此蓋其精神全用于廢削而才幹更昧于清查  
若非逐丈無遺不知安所底止真公私之一大  
蠹也計贓擬徒猶有餘罪王仲善等分別徒杖  
各爲當辜旣經該司招詳前來理合具

題伏乞

勅下兵部覆議上

請行臣遵照施行緣奉

欽依劄仰提問及係武弁違法廢軍侵屯冒糧戀印

營私乞

賜提究以飭軍政事理未敢擅便爲此具本專差承

差魏應茂齋捧謹題請

旨奉

聖旨

請謚名賢疏

題爲公訪

謚興事查得接管卷內萬曆四十二年四月二十二  
日奉都察院勘劄准禮部咨本部條陳內一款  
前事題奉

聖旨這所奏有禪典禮俱依議行欽此又查

謚典五年一議以時考之政值甲寅惟是宇宙遼闊  
咨訪宜周凡各省直接差當觀風之餘豈無有  
事功崇隆節義彪炳理學淵深孝友篤摯得於



耳聞目擊者乎往或拘于名位致令幽人貞士  
潛德埋光者漏之網羅之外非所以闡幽光維  
風教也移文各省直巡按務將境內直賢覈實  
考訂勿拘久近勿分顯晦勿循雷同凡子孫妄  
乞知交濫獎須一切屏格不行等因劄行前來  
該前按臣轉行布按二司并該道及所屬欽遵  
在卷該臣入境以後多方詢訪擬據所聞入告  
繕寫已成隨見禮部覆疏已上似已無及故姑  
待之頃者

俞綸尚稽而臣已弛擔出境則有不敢終輟者臣惟  
國家勵世磨鈍無如易名之典矣蓋其評題在一  
時而芳聲在千古故必其有三立之表樹而後  
可以膺兩字之

褒嘉此其道質顯幽而其議俟先後者也顧隙駒易  
度則高賢大良之懿範旣無繇親炙于當年而  
堂燕已飛將忠臣烈士之貞魂亦何緣憑弔于  
今日於是有非所得而得之者跡涉于私私爲  
不義旁觀者所爲憤懣也有不當遺而遺之者

跡鄰于蔽蔽爲不祥尚論者所爲歎歎也夫孝  
子慈孫之陳乞不如里巷之歌謠扮榆朋好之  
游揚何似童叟之傳誦觀風者當不以彼易此  
矣臣馳驅東粵周爰咨諏景前哲之行藏叅家  
國之譜乘大都羅嶺嵯峨之氣海濤浩瀚之精  
鬱爲忠良流爲風韻其間雄才碩德偉績豐功  
臨白刃而不驚留丹心于異代者蓋濟濟焉前  
按臣王以寧所舉十二人近該禮部題

請入彀者譚大初楊起元龐尚鵬三人而已其他如



王纘葉夢熊張澤唐胄彭誼羅亨信周志新薛  
侃薛宗鎧皆名實相孚

朝野推重者其品格行實俱列前按臣疏中仍應  
列之訪冊以俟公論臣姑不敢贅陳外續得六  
人據實題

請伏乞

勅下禮部覆議如果臣言不謬將張泰等一體

賜謚俾諸臣大節精忠鴻猷實學不致淪沒無聞而  
於

國家廣勵世風之意亦無負矣緣係公訪

謚典事理未敢擅便為此開坐具本專差承差郭民

欽齋捧謹題請

旨奉

聖旨

計開

原任南京戶部尚書張泰廣州府順德縣

人少有至性事父母以孝聞事庶

兄恭甚讓其產之腴者登成化進

士初知沙縣邑經兵火悉心撫字  
凋瘵得蘇公暇視學考課表章羅  
仲子陳瑩中之學鐫其遺書以傳  
三書徵爲御史疏論

宮闈與政語甚切直

上大怒杖之幾死督學畿輔憂歸哀毀骨立十餘年  
不起復按滇奏增解額五人薦童  
科董祀後竟及第其有知人之鑑  
如此先是象馬思牒囚執木邦宜



慰司罕宓法幾四十年所前按臣  
莫能釋泰徵兵臨其境移檄諭之  
思標感畏出罕宓法復其故業縛  
獻首禍者三十餘輩積患頓解人  
服其能比還

朝請誅中貴及戚畹諸不法者

上怒甚同朝懼不測已而奪俸半年陞南京太僕少

卿改大理會薊州

皇莊與牧地爭界久不決泰執永樂圖籍爲左驗權

貴乃服遷副都御史督儲南京條  
上十二事多所采行晉工部侍郎  
改南京右都御史屬當入

賀時逆瑾勢焰熏灼或諷以宜厚遺泰僅餽二葛  
瑾銜之尋遷南京戶部尚書

予致政蓋瑾意也歸三月卒官至六卿僅守先世故  
產子孫有饑寒者夫逆鱗骨鯁諍  
臣所難泰獨瀕死不悔指斥

宮闈裁抑戚倖恥媚權璫晚節益堅卒得致其事

而死蓋表表節義之臣矣

原任南京工部尚書陳紹儒廣州府南海

縣人嘉靖戊戌進士初授戶部主

事首易衡鍼以便輸金者藏吏無

所昂抑宿弊頓祛又議設陪閱主

事遂著為令

進會計錄歲省京邊冗費二十餘萬視餉遼左條

上防守事宜皆鑿鑿石畫虜寇猝

至帥象乘陣手挽強弩輒命中虜



以爲神引去補鄖陽監司襄樊水  
溢築老龍諸隄捍之至今永賴以  
忤權貴謫同知泉州轉南昌守再  
遷粵西備兵右江議設六堡分兵  
居守授田爲餉徭賊遠遯叅藩閩  
蜀歷觀察布政使入爲順天尹調  
太常卿

穆廟耕籍石問禮儀引據故典條對甚悉晉南京戶  
部右侍郎有

詔分團營爲伍營力言其變亂

舊制不可議遂寢尋轉左提督倉場疏陳遼東等十  
三鎮兵馬主客之費

請修屯選兵裕正供以省京運凡萬餘言定漕運陸  
限歲免漂沒今悉從之遷南京工  
部尚書致政紹儒立朝事業蓋于  
兵食爲拳拳而經制素豫能銷釁  
于未萌其與救功于勘定者何啻  
倍之至其議禮禮成拒虜虜却可

謂文武才矣生平孝友事嫡伯篤  
宗盟而晚歲懸車好學不倦家脩  
廷獻蓋無忝焉

原任南京禮部左侍郎陳璉廣州府南海  
縣人洪武庚午鄉薦初仕桂林教  
授條陳規範講明經史士相勸勉  
時

朝廷

詔武臣子弟詣學璉誘掖使知忠孝諸司政有未通



咸趨質正都督韓觀獨敬禮之秩  
滿晉國子助教永樂初以治才異  
等擢知許州恤災疲興教化循聲  
大著復改滁州問民疾苦時當草  
昧之初賦役爲累均徭時斂民若

更生

文皇帝遣廷臣察吏治璉居最滁人惟恐失之奔走

詣

闕乞乂任乃擢揚州知府攝滁州事

賜綺衣寶鈔賜宴給驛還滁蓋特數也

召充會試同考官所收皆知名士擢四川按察司申

明憲紀禁伏橫豪蜀人畏而懷之

建言修武備慎刑罰明禮制等九

事

上嘉納焉宣德丙午吏部以躉品望素重宜式成均

改南京通政使攝國子監事表儀

羣英彬彬禮教尋以艱歸正統初

起南京禮部侍郎天下方倚重之

璉知王振用事時不可爲遂致政  
璉敦行孝友博極羣書一言一動  
皆有準繩師法古人以興起風教  
自任治民民安訓士士從蓋其不  
言躬行所沁入也守滁十年滁人  
尸祝之與歐陽修王禹偁並列爲  
三而議者謂璉之治蜀清節比趙  
抃嚴明同張詠云

原任禮部精膳司員外郎贈太常寺少卿



張粲廣州府順德縣人生而穎異  
年十五補邑庠弟子員里豪有侵  
其先墓者其族僉事善昭弗能白  
粲上書按臣使墓得歸善昭語人  
曰此吾家千里駒也弱冠登正德  
辛未進士授建平令建平故巖邑  
至則進長年三老問民疾苦興學  
校獎忠節邑大治先是視江御史  
有里人遊建平曾屬粲粲拒之邑

豪猾爲粲所治者乘機誣構遂註  
下考調廣昌治如建平遷禮部主  
客司視四夷館時中丞御史彭澤  
屢討流賊有功爲時議所躋與大  
司馬王瓊素有隙瓊發其賂上魯  
番贖城事欲寘于法粲廉其無罪  
往說大學士梁儲爲之地儲憮然  
畏瓊未卽許也再往乃諾踰日瓊  
遣人持牒邀粲窮其事曰此宋覆

鞞也事成有顯擢榮曰誤矣大夫  
出疆苟利國家專之可也澤與土  
魯番檄故在豈宋屈已和戎比耶  
公毋汗我使得罪天下後世卒不  
署牒閣部臺省多救之澤遂得釋  
遷應司員外郎時朝臣爭

孝廟改稱皇伯考乞留本生二字相率伏左順門哭  
諫不起

上大怒收繫



詔獄廷杖有差于是繫被杖死年僅三十有八粲未  
死猶力創草疏數千言創甚投其  
疏謂李義壯曰身盡廢獨此心耿  
耿耳聞者莫不傷之隆慶改元以  
御史龐尚鵬言贈今官粲忠貞天  
菹以御史臨縣令而不受以司馬  
邀郎署而亦不受大禮之爭筆楚  
殆斃猶惓惓爲補牘計蹇蹇匪躬  
所由與龍逢比干爭烈矣

原任淮府長史贈太常寺少卿莊璵潮州  
府揭陽縣人弘治丙辰進士家世  
貧薄好學不倦及通籍服御不改  
寒素初令安福政尚簡易與民清  
靜句校簿書私識而行吏胥莫能  
窺其意分疏是非未嘗厲聲色然  
執法不少徇人或以速謗懼之答  
曰三尺法如是吾如是行之耳何  
畏焉令行禁止無不信者禮士作

人捐俸廩創學舍數十間以居貧  
士士翕然宗之三年政事爲豫章  
最然勞瘁過甚體羸不勝因有謝  
事之志改郡學博尋調國子監博  
士又以驚直忤時遷淮府長史宸  
濠素蓄異志意輕

諸宗挾貸

淮府歲祿若干石璵持不與復禁絕其私交濠飲  
恨購官黎安上疏誣以離間



宗親典聞之挺身往見濠詞色不少屈濠怒杖之  
寘於獄不食三日衣冠危坐而死

淮王痛悼上疏白其寃

詔命有司開棺視手足筆楚狀疏覆

上黎安仍以計寢妻子無所依

淮王卹助之遣人歸其親

肅皇帝改元御史王完疏其直節

予祭贈今官夫死生亦大矣逆濠無將視諸王傳如

發蒙振落乃獨憚典而典以王傳

憂危

宗社陰折逆謀至寧死而無懼也殺身成仁殆謂是

乎

原任吏部郎中唐伯元潮州府澄海縣人

弱冠登賢書便有志聖賢之學甲

戌成進士初仕萬年調繁泰和俱

有實政士民尸而祝之載邑乘晉

留曹司會計甚稱暇日與友人究

訂學問大有體認仍親校古石經

註釋大義疏

請付史館得

俞旨會禮官議從祀王守仁遂昌言排之其意主于  
翼朱熹遵

祖訓雖謫判海州其品益重未幾擢保定推官尋擢  
禮部儀曹日考索諸

郊廟宗社典制奉

旨選官人既竣事具疏

請端大本語甚忠懇旋以疾歸侍二親甚歡逾年起



補原職典試湖廣所拔皆名下士

方報

命遂轉尚寶司丞無何以計歸服闋以故官起旋改  
銓部遂陞正郎秉選蓋異數云是  
時在事者多以嚴謹去元至改圓  
缺爲掣籤諸所秉公剔弊法犁然  
具屢有疏陳俱蒙

皇上嘉納時冢卿孫丕揚屢薦其賢

請補太僕卿

旨未下而元兩疏請告得還里居二年卒矣元之學  
一意反身鄙聚徒講學爲務外嘗  
曰孔門無心學之教大學言誠意  
正心必以脩身爲本又曰萬物皆  
備于我我亦一物也物有本末知  
所先後格之謂也格物本脩身皆  
發前儒所未發蓋其反身卓有實  
際非僅僅爭於口舌者生平餘俸  
置產以均二庶躬行禮教爲族

里倡立社粟以濟貧創祭田以奉  
先皆聖賢遺軌所著有醉經樓集  
禮編易註道德經解太乙堂采芳  
亭愛賢堂集甚行于世夫立言立  
德兼之者難矣乃其爲宰則所至  
血食爲郎則抗疏憂道秉銓則仕  
路頓清敵蹤卿貳此豈志在爵祿  
者至其發爲文章根極理道融會  
性命庶幾脩詞立其誠焉所謂慥



體君子非耶